



E je vignude fûr di pôc la storie des bandieris furlanis butadis tes scovacis in ocasion de partide ITALIE - FINLANDIE pai Campionâts Europeans di balon. No si podeve quartâlis te Dacia Arena e alore a son restadis fûr... finidis tai sacs neris...

Mi è tornât iniment di cuant che, tancj agns indaûr, o jeri lât cun Bano a viodi Udin-Napoli al Friuli. Percuisîts come che o fossin delincuentes. Il baston de bandiere blancje e nere di Bano lassât di fûr ma chel al jere just...

A son dîs agns che no voi a viodi une partide. Di chês volte che il nestri paron al veve vendût il stabiliment a une imprese asiatiche.

Savês no, la globalizazion...

Nô o vevin protestât. O jerin ancje lâts sul tet dal capanon, si visaiso? A vevin fevelât i gjornâi. Tal stadi, in dîs di nô o vevin esibide une grande scrite cuintri dal nestri paron. E nie, la partide e jere Udin-Atalante (1-3... pierdût il stabiliment e pierdude ancje la partide...).

Ma cumò o soi plui babio, e mi è vignude voie di tornâ al stadi, magari cuant che e tornarà a

zuiâ la Italie... metintmi intor une biele maie cu la acuile. O jentri dentri cu la felpe cun scrit FORZA ITALIA parsore e dopo me gjavi... e sot o mostri la gloriose acuile dal Patriarcje... ah ah ah...

Se in cetancj di nô a fasessin cussì ... sâstu ce colp di voli tal stadi... une muraie di int blu e zale...

Metìn in mil di nô che a comprin la maie a dîs euros... a son dîs mil euros che a finissin a pro dal Friûl, dai lavoradôrs furlans, po, dal tessile che al à tante dibisugne di tornâ in salût se no ca al va dut in vacje, come che o sin lâts in vacje nô cul nestri stabiliment...

Alore o ai comprât la maie! E o ai stiçât ducj chei che o cognossevi a fâ compagn! In pôcs dîs o soi diventât il miôr marcjadant di acuilis dal Friûl!

E chest fintremai che o ai cirût di vendi une a gno nevôt.

«Dîs po barbe, viôt che la dite si clame FRUIT OF THE LOOM (Pomis dal zeî) je une multinazionâl... magari lee la maiute le àn fate in Maroc!»

di Milio dai cjans